



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Sudan army-i tongtiban
highway ka aziokogo**

**Diomande-i Real Madrid
taginüba mulunga agizükogo**



VOL. XXIII ISSUE NO. 285 (ADOK 285) DIMAPUR SANGTENNÜ (TUESDAY) CHITENI (JULY) 28, 2026

₹ 5.00

Longleng nung anentsüh alubatem asadang

Dimapur, July 27, 2026 (TYO): District Disaster Management Authority (DDMA), Longleng-i rongdak senden ka ayonga Longleng nung alima lendong balala atalokba asadangogo.

Iba senden nung MLA & Airways & Railways Advisor A. Pongshi Phom aser MLA, B. Bangtick Phom na aden aser parnoki lenmangtem lapoktsüba atema shisalemsatsep.

July 19 aser 20 anogotem alima lendong balala atalokba ajanga Phom area ajunga kongshia lir aser lenmang tesentaktep mali kumogo, ajisüaka kanga tia kaa lendong balala nung nisung taküm samaba mali ta Pongshi Phom-i ashi.

District Administration den Phom Peoples' Council, temeimertem, arogotem, kaketshir teloktem, civil societies aser public-i yaritepba atema tenüngsang agütsür ta paisa ashi.

Deputy Commissioner den amalitepa ration aser basic amenities agütsütsü aser tensa tajungba maküm tashi public-i amalitep alitsü aser angateta yariteptsü mepishir, ta MLA Pongshi-isa ashi.

Sorkari transportation services angati agütsüba timi amshitsüla aser iba teyari ya

kaketshirtem aser shiranger nem mezüng agütsütsü ta paisa shisem.

Senden nung Deputy Commissioner & Chairman DDMA Longleng, W. Manpai Phom-i MLA anaprong adenba atema pelaba metetdaksü.

DC Manpai-isa PowerPoint presentation ka ajanga Longleng District nung Rock, Mud, Debris, Avalanches indang osang tejangja lemsatsep.

Külen, Deputy Commissioner-isa Longleng nungi Kohima o Dimapur-i aoertem asoshi khen atema maparen kar renemba metetdaksüogo.

Tanga osang ka magütsü tashi DC office (Longleng-Tuensang-Chare-Mokokchung) ajanga senzütsü metetdaksür aser iba mapang highway lapoktsü atema mapa inyakdar ta pai ashi.

Iba lenmang kanga majungba agi passenger temi limited baggage (passenger shia seret 5) dang abentsü mepishir ta Longleng DC-isa metetdaksüogo.

Iba mapang tsüngda asoshi para tera melenshiogo aser ibaji Longleng- Dimapur Rs. 1,600; Longleng- Kohima Rs. 1,500 aser Longleng - Tuensang Rs. 600 asütsü ta paisa ashi.

North East NSS Festival 2026 amunger

Kohima, July 27, 2026 (TYO): Kohima Science College, Jotsoma nung anogo pungunü North East NSS Festival 2026 tenzükogo.

July 27, 2026 nü Northeastern state 8 nungi National Service Scheme (NSS) volunteers adenshir "Viksit Bharat" omen kübok iba benjung amunger.

RCEMPA, Jotsoma nung benjung tenzükba sentong nung School Education Advisor Dr. Kekhrielhoulie Yhome-i NSS volunteers dang bendanga agüja tenzüksü, lenitsü aser linük ka akümtsüba tangatetba nung noktaksü ayongzük.

"Iba benjung ayongertemi Northeast ajungalen nungi volunteers sabang ka nung anidenba atema tenüngsang agütsür. Oshioben aser sobaliba balala süaka Northeast region ya meimchir tenzüksü tangatetba agi longjema lir" ta Dr. Yhome-i ashi.

Iba benjung ajanga volunteers-i medemer yimteptsü, tebilemba lemsateptsü, kati ka nungi angazüksü aser pei pei lokti nung temelenshi tajung bener arutsü ajungmesotsü maongka angutsü ta paisa ashi.

Dr. Yhome-isa volunteers dang National Service Scheme tangatetba nung nüma tanga aser

bendanga agüja ammettsü ayongzük.

Iba benjungmung nung cultural exchange, quiz competition, technical session, sightseeing, cleanliness drive amala alitsü. Iba benjung nung NSS volunteers 300 adener ta State NSS Officer, Nagaland Ruokuovituo Zatsu-i ashi.

Iba sentong nung mendenji Programme Officer, NSS, Kohima Science College, Jotsoma Dr. Subenthung P. Tsopoe liasü, Regional Director, NSS, North Eastern Region D. Carthigueane-i okila jembi aser Chaplain, CCP, KSCJ Kivipu Jimomi-i temoatsü meshia sarasadem.

July 31, 2026 nü benjung shibangba sentong nung Roko Angami, OSD (Sports), Department of Youth Resources & Sports, Government of Nagaland adentsü.

North East NSS Festival 2026 ya State NSS Cell Nagaland ajanga ayongzüker aser Kohima Science College (Autonomous), Jotsoma-i host asür. Iba benjungmung ya Regional Directorate of NSS, Guwahati, Ministry of Youth Affairs & Sports, Govt of India den yaritepa amunger.

Nagaland Police gari tasen 549; Mobile Forensic Vans 12 sayaogo



Dimapur, July 27, 2026 (TYO): Chief Minister Dr. Neiphiu Rio-i July 27, 2026 nü Police Complex, Chümoukedima nung police gari 549 aser Mobile Forensic Vans 12 tashi sayatsüogo.

State aser Union Territory tem nem Modernisation of Police Scheme kübok item garitem ali aser iba ajanga Nagaland nung policing, mobility aser scientific investigation tashitaitba akümtsü.

"Item garitem ya financial year 2025-26 atema Assistance to States and Union Territories for Modernisation of Police (ASUMP) Scheme kübok aliogo" ta CM Dr. Rio-i ashi.

Police modernisation programme kübok Nagaland-i Rs 150 crore jungnüa nguogo aser iba ya mobility, CCTV surveillance, Automatic Number Plate Recognition (ANPR) systems aser Smart Police Suite dena policing infrastructure ajungkettsü ateam lir ta pai ashi.

Gari 549 ya Rs 81.65 crore endoka aliogo aser iba ajanga police gari tejen 35 nungi 40 shi melenzüksü ta Dr. Rio-isa ashi.

Nagaland Police gari tesadang ka shi kanga tejen kumogo aser iba ajanga districts, police stations, IRB battalions, highway patrols aser investigation units inyaksangshi nung timtem ajurur ta pai ashi.

Paisa police dang garitem timi aser ochishia amshitsü, operational requirements nung ajemdaker amshitsü, district

executive forces aser meta talang pilar alir nem temulung agütsütsü ayongzüka liasü.

Nagaland nung tashiyim agi sen meshiba, drug shibelenba, cybercrime, senotsü tsütsü ashioksüba, nisung shibelenba aser tetsür o tanurtem anema tashiyim inyakbatem atema specialised investigation aser technological capability tajungba nungdaker ta CM Dr. Rio-isa ashi.

Asenoki scientific investigation ajanga criminal laws tasentem benschitsüla aser Mobile Forensic Vans 12 ya district executive forces nem agütsüogo aser ano tarutsü nung agütsütsü ta paisa metetdaksü.

Nagaland Police-i maneni investigation-oriented aser community-centred policing leni melentsüla ta paisa ashi.

Prime Minister Narendra Modi, Union Home Minister Amit Shah, Ministry of Home Affairs, Deputy Chief Minister Y. Patton, Home Department aser sendaktepa alir ajak police modernization asangsang kümdaksüba atema pelar ta CM Dr. Rio-isa metetdaksü.

"Gari tasentem bendenlokba ya Nagaland Police nung operational aser forensic capabilities nung tongtipang alizüng ka lir. Garitem nung ambulances aser water tankers dena lir aser iba ajanga emergency response aser public service delivery tajungba akümtsü" ta DGP Rupin Sharma-

i ashi.

Ministry of Home Affairs, Government of India aser State sorkari police modernization atema maneni yariba pelar ta pai ashi.

Chief Minister Dr. Neiphiu Rio-i teti Chief Minister Dr. Neiphiu Rio den Nagaland nung nungdakba onüktem lemsatapa aruba ajanga Nagaland Police-i meimlaba senotsü teyari angur ta DGP Sharma-isa shisem.

Police Modernisation Scheme kübok taoba nung kumshia Rs 5 crore nungi Rs 20 crore tashi lemozüka liasü saka financial year 2025-26 nungbo Rs 155 crore jungnüa nguogo ta paisa ashi.

Ministry of Home Affairs-i kanga junga asadangba aser Nagaland Police ketdangsürtemi sentongtem renemba ajanga iba ya inyaktetogo ta DGP Sharma-isa metetdaksü.

Central assistance aser State share mapang shitak nung anguba aser amshiba ajanga tarutsü nung senotsü teimba angur. Nagaland Police nung modernising equipment aser mobility tejakleni aoer saka police stations, outposts aser residential accommodation amala police infrastructure nung teyari tulu nungdaker ta paisa tebilemtsü lemsatsep.

"Tarutsü nung police modernization ya technology, cybercrime, forensic science, intelligence gathering aser investigative capabilities nung talila rangloksüla" ta Rupin Sharma-isa metetdaksü.

Iba sentong nung Additional Director General of Police (Law & Order), Sandeep M. Tamgadge IPS menden liasü aser Deputy Chief Minister Yanthungo Patton-ia o jembi.

"Gari tasentem ya light motor vehicles 152, medium vehicles 325, heavy vehicles 68, motorcycles 4 aser Mobile Forensic Vans 12 lir" ta Tamgadge-i ashi.

Forensic vans nung biological, cyber, explosives aser narcotics forensics dena criminal laws tasentem nung keta alibatem lir ta paisa ashi.

Assam nung tzümetsüng tensa tajungba akümer

Guwahati, July 27, 2026 (Agencies): Assam kübok district 9 nung nisung 5.24 tema tzümetsüng agi timtemer aser nütünsung yongsük teimba Charaideo, Sivasagar aser Jorhat district tem nungi lir ta Disaster Reporting and Information Management System (DRIMS), Assam ajanga sangdongba flood bulletin nung ashir.

Charaideo, Golaghat, Jorhat, Sivasagar, Hojai, Kamrup, Kamrup (Metro), Nagaon aser Dibrugarh district tem nung

revenue circles 24 kübok yimtsüng 763 nungi nisung 524,733 dak tzümetsüng agi kongshia lir ta parnoki ashir.

District tem rongnung nisung teimtibaji Charaideo nung 188,404, parnok sülen Sivasagar nung 154,064 aser Jorhat nung nisung 137,775 timtemer. Tzümetsüng ajanga alu 48,742.09 hectares metsüngbanga lir ta DRIMS, Assam-isa metetdaksü.

Deobar tashi nung danger level tema ayimba ayongji Numaligarh nung Dhansiri

(South) River dang liasü aser iba dak alia highest flood level tema ayimba ayonga mali ta parnokisa ashi.

State sorkari relief camps 109 aser relief distribution centres 245 züngsema relief facilities 354 lapoka nübortem yaridar. Tang nisung 37,724 tashi relief camps nung jenoka lir aser relief distribution centres ajanga nisung 153,833 nem teyari agüja arudar.

Deobarnü nisung ana asüba züngsema tzümetsüng lendong balala nung nisung 68 taküm samaogo.

Dimapur DPDB nung LADP 2026-27 agizükogo



DPDB Dimapur senden amenba noksa nung angur.

Dimapur, Chiteni/June 27 (TYO): Ita shia amenba District Planning & Development Board (DP&DB), Dimapur senden July 27, 2026 nü Deputy Commissioner, Dimapur indang Conference Hall nung mena liasü. Iba senden nung Advisor, Industries & Commerce & Chairperson, DPDB Dimapur, Hekani Jakhalu aden aser Dr. Diana Patton, ADC, Dimapur menden sür agia liasü.

Iba senden tenzuka Dr. Nyanthung Kikon, State Nodal Officer, ABDM, Department of Health & Family Welfare ajanga Ayushman Bharat Digital Mission (ABDM), Nagaland

indang PowerPoint presentation agütsü dang iba mission indang nükjidong lemsatop aser Dimapur ya iba sentong kübok model district lir ta ashi.

Iba sülen parnoki Local Area Development Programme (LADP) 2026-27 agizüka liasü aser Societies Registration Act kübok Covenant Foundation indang registration meshiba mela liasü.

Education sector kübok ITIKI Montessori School nungi ITIKI School, Darogapathar, Dimapur ta melentsü mela aser Grace Fountain School, Duncan Bosti nung Class V nungi Class VIII tashi upgrade asütsü

temelaba agütsü.

Maneni Pranab Vidyapith Higher Secondary School, Milan Mandir nem Grant-in-Aid agütsütsü mela aser Zakiesato Memorial Higher Secondary School, Dimapur kibur melentsü asüngdangba khen asoshi thinena ayu.

Senden tatemi jembidang Advisor Hekani-i Board züngsemtem dang senden nung shilem agiba atema pelaba lemsatop aser ano tali bendanga agütsür inyaksü ayongzüka liasü. Lai DPDB senden nung teti adentsü ayongzüik aser medenteter temi temelen nübu shimer yoktsü ayongzüka liasü.

VVP 2026 nung Kohima nungia shilem agi

Dimapur, Chiteni/July 27 (TYO): Viksit Vibrant Village Programme (VVP) 2026 kübok Ato Kilonser Narendra Modi den virtual yimya nung sensaksemba sentong ka July 26, 2026 nü Deputy Commissioner, Kohima indang office nung ayongzüka liasü.

Iba sentong nung Kohima district nungi lanurtem densema

nisung 20 shilem agia liasü.

Linük tesem ajungalen virtual yimya nung sensaksemba mapang ato kilonser-i Viksit Bharat mangdang tashi itshitsü atema India indang arütsülen aliba yimtsüngtem den amalitep akaba asoshi tenüngsang agüja liasü.

Pai arütsülen tesemtem ya kanga tongtipang lir ta ashi aser sobaliba wazüka ayutsü

nüngdakba jembi aser lanurtem dang linük telunghjem, terenlok aser pei sasa pei poksüngteta alitsü atema ambassadors ama inyaksü lanurtem ajungmesoa liasü.

Shilem agirtemi tejangraba tulu nung iba live interaction nung aden aser ato kilonser den sensaksemtü maongka agütsüba atema pelaba lemsatopa liasü.

Mon alinen nung asür bilemteta sarasadem sentong agi



Dimapur, Chiteni/July 27 (TYO): Defence Colony, Mon Town nung July 19, 2026 nü alinen aluba lendong nung asürtem bilemteta Prayer and Candle Light service ka July 26, 2026 nü Konyak Baptist Church, Mon ajanga ayongzüka liasü.

Iba sentong nung Deputy Commissioner Mon, Wennyei Konyak, NCS-i KBCM dang iba ama sarasadem sentong ayongzüka atema pelaba lemsatopa liasü.

Pai mangyimer kibongtem den asükhu lemsatop aser tasü ita alitsü aser Tsüngrem tashi bushitsü ajungshia liasü.

Sorkar agencies aser

nüburtemi jila nung aliba machinery amshia anogo trok tashi bushir monguteti aliba nisung ana asoshia pai tejashi lemsatopa liasü.

Pai nüburtem dang iba ama lendong timtem mapang lungjemer nokdaksü aser alinen agi raksar aliba jila yanglushitsü ayongzüka liasü. Kasa mapang 42 Assam Rifle Mon, Police, SDRF, NGOs aser wards ajunga nungi Volunteers temi amalitep akaba aser bendanga agütsür yaritepba asoshi tenüngsang agüja liasü.

DC Mon-isa Chief Minister Dr. Neiphiu Rio-i anir state sorkar aser Mon district nungi MLA toku dang temeim aser

teyari asoshi pelaba lemsatopa liasü.

Iba sentong nung asür Pomei kinungbo Yinai aser kibong ka nungi züngsem ajunga takum samar ka kisüng kumzüksang Hetwang nati iba lendong mapang ajangshibatem lemsatopa liasü.

Sentong nung Minister CL John aser pa kinungtsü dena liasü.

Sentong nung Konyak Union tir Yamao Konyak, Konyak Students' Union tir Temwang Konyak aser ENSF tir temia o tatsütsü jembi aser Rev. H. Moba Konyak, Pastor KBCM-i Tsüngrem o jembia temu milen tsükloka liasü.

AHoDs aser HoDs senden July 29 nü amentsü

Dimapur, Chiteni/July 27 (TYO): Administrative Heads of Departments (AHoDs) aser Heads of Departments (HoDs) senden ka July 29, 2026 nikongdang 3:00 ako nungi tenzuka Nagaland Civil Secretariat Conference Hall,

Kohima nung amentsü, ta Home Department, Nagaland ajanga sangdong ka nung metetdaksü.

Iba senden nung AHoDs aser HoDs ajunga arua adentsü metetdaksür, ta sangdong ajangasa ashi.

Dimapur nung 80 buba l. Day atema renemshir

Dimapur, Chiteni/July 27 (TYO): Dimapur nung taküm 80 buba Independence Day amungtsü atema terenemshiba senden ka Deputy Commissioner, Dimapur indang Conference Hall nung Wiridin, NCS, Sub-Divisional Officer (Civil), Dimapur lenisüba kübok Hombarnü mena liasü.

Iba senden nung August 15, 2026 nü Independence Day anogomung sentong asadangshia sentong takok nung agitsü mechi sorkar indang departments aser agencies balala tsüngta mala lemsatsü.

Iba mapang sentong aser logistics achayangtsü atema department balala nem nungloktsü. Sentong tajungba nung yanglua inyaksü asoshi administrative ketdangsür, sendaktepa aliba departments aser stakeholders tem amalitep akatsü indang jembia liasü.

SDO (Civil), Dimapur, Wiridin-i departments ajunga dang 80 buba Independence Day takok ngua tajungtiba nung amungtsü atema nungloktsüba mapa tajungba nung inyaksü aser amalitep akatsü ayongzüka liasü.



Advisor, Airways & Railways, A. Pongshi Phom aser MLA, B. Bangtick Phom den Deputy Commissioner, Longleng, W. Manpai Phom aser ketdangsür temi July 27, 2026 nü Longleng district kübok alinen alua aliba tesem semdanga jajadang tangokba noksa nung angur.

NBSE-i Vidyadhan Scholarship atema application meshir

Dimapur, Chiteni/July 27 (TYO): Nagaland Board of School Education (NBSE) ajanga Heads of Institutions ajunga dang sangdong ka nung, S. D. Shibulal (Co-Founder & Former CEO, Infosys) aser Kumari Shibulal (Patron) nati 1999 küm amenokba non-profit organization, Sarojini Damodaran Foundation (SDF) (www.sdfoundationindia.com) ajanga Vidyadhan Scholarship atema applications meshir ta ashi.

Vidyadhan Scholarship Program yagi rongsenketzung tsütsü jenjang tamajung nung aliba kibong tem nungi takok tajung ngutetba kaketshir college education nung yarir.

Kaketshirtem ya Class 10 renemba sülen yimya balala amshia shimer. Shimtetba kaketshirtem ya Class 11 aser 12 atema küm shia scholarship sen 10,000 agütsür. Iba mapang parnoki junga züngtetra, parnoki jangraba degree course atema scholarships agütsür, aser item scholarships ya indang indanga Foundation ajanga agütsür mesüra Foundation nung register süa aliba sponsors temi agütsür.

Graduation atema scholarship ya küm nung sen 15,000 nungi 75,000 tashi agütsür. Ano shimtetba kaketshir nem soft skills training aser career counselling agütsür.

Iba scholarship ya küm nung sen 3 lakhs tashi anguba kibongtem asoshi lir. Kaketshir ya Nagaland nungi HSLC Examination 2026 nung marks shilem 70 aser tema (matamabensar atema shilem 60) mesüra subjects ajunga nung A+ grade ngur alitsüla.

Temsüa aliba kaketshir temi www.vidyadhan.org mesüra SDF Vidya App (available on the Google Play Store) nung login süa April 29, 2026 nungi August 31, 2026 tashinung online ajanga apply asütsüla.

Iba scholarship indang osang tali tejangjaba metetner temi vidyadhan@ndia.com mesüra +91 8068333500 / +91 8904846919 (Helpdesk) nung tongteprateptsü akok.

Kaketshir temi iba scholarship maongka agitettsü mechi registered schools (Government & Private) ajungai nüngdakba mera agitsü metetdaksür, ta NBSE sangdong ajangasa ashi.



July 27, 2026 nü New Delhi nung Congress Tir Mallikarjun Kharge aser Congress General Secretary, KC Venugopal na den tangartem opposition INDIA teloktep senden nung adendang tangokba noksa nung angur.

Rong nung India nunger amakba sülen MEA-i Ukraine ambassador jaok

New Delhi, July 27 (Agencies): Ukraine kübok Odesa anasa India nunger pezü densema aliba rong ka amakba sülen Hombarnü New Delhi nung Ministry of external Affairs (MEA)-i, Ukraine Ambassador, Dr Oleksandr Polishchuk jaok.

Black Sea nung security tensa tamajungba akümba mapang ka nung Amongnü rongji amakba sülen anogo ka dang lirbo MEA-i Ukraine ketdangser jaok.

MEA-i sangdong ka ajanga, "Commercial rong MV OMORFI amakdang India nunger ka asüba dak sendakba nung Ministry of external affairs-i tanü Ambassador of

Ukraine to India, Dr Oleksandr Polishchuk jaok," ta metetdaksü.

MEA-isa, "Ministry-i iba tatalokba atema tebilemtsü akaba lemsatep aser commercial rong amakbaji sashia aitsüogo. Item ama inyaksangshi ajanga tzüym nung senzürtem kongshitsü, tzüym nung sadema senzüba temeden ilatsür aser International commerce jenjang raksatsür," ta metetdaksü.

"MEA-i ambassador dang, commercial rong amakba atema India-i tebilemtsü akaba aser tzüym nung senzür tai maket nisungtem lendongi yoktsüsa inyaksangshi masütsüla ta Ukraine

ketdangsertem dang mepishang, ta metetdaksüogo," ta MEA-isa metetdaksü.

Ukraine nung aliba Indian embassy-i, rong amakba lendong nungji India nunger pezü nungi ana kümzükogo aser tanüngba nisung ana osang atadar, ta metetdakja liasü.

July 19 nüa Odesa nungi MV Golden Leo rong apusoba sülen mapang tatsüka tsüngda iba rongji amakdang India nunger pezü asü aser ka yirua liasü.

Iba tatalokba sülen Ukraine foreign minister Andrii Sybiha-i shidi ka ajanga external affairs minister S Jaishankar den mangyim jashi lemsatapa liasü.

Delhi transport tentettemi E20 toztü anema longkak aittsü

New Delhi, Chiteni/July 27 (Agencies): Delhi nung aliba transport tentettemi petrol toztü nung ethanol meyoktepba anema Parliament tashi longkak aita jajatsü.

Petrol shilem 80 nung Ethanol shilem 20 meyoktepba dang E20 toztü ta ajar, aser iba toztü anema online campaign-a tenzükogo.

Delhi Taxi & Tourist Transporters and Tour Operators Association leniba nung tentet balala nungi züngsemtemi longkak aittsü.

All India Motor Transport Congress Tir, Harish Sabharwal-i, sorkari sensotem nem E20 toztü dang agütsüba anema association-i longkak aiter, ta metetdaksü.

Hombarnü Osangbenertem den jembidang Delhi Taxi & Tourist Transporters aser Tour Operators Association nung Tir, Sanjay Samrat-i, "August 4 anogo nung onoki petrol nung ethanol meyoktepba anema Parliament tashi longkak aita jajatsü tebilemba lir. Iba tebilemtsü onük memeteti amoui oa aliba MP tem onoki akasodaktsütsü, kechiyong ethanol meyopktepba toztü atsükba ajanga gari nung timtem adokba osang linük tesem ajaklen nungi angashir," ta metetdaksü.

Paisa, "Ethanol meyoktepba petrol ya sensotem dang kangshia mayoktsüla, saka sensotemi shimtetsüsa lenmang lapoktsütsüla. Tang tashi nungbo shimtetsü atema lenmang lapokja mali. Parliament tashi longkak aita jajabaji onokia pusemtsü, saka tang tashi nungbo association-i tayongzükba kecha agüja mali," ta metetdaksü.

Samrat-i, "Onoki iba ya yimtenren onük ka mekümdaktsüner aser onok 'E-20 Janta Party', Cockroach Janta Party mesüra yimtenren party kecha den-a tesendaktep mali," ta ashi.

E20 anema anogo ishika tejaklen "E-20 Janata Party" ta ser online movement ka tenzükba sülen Instagram aser X nung followers aika kümogo. Petrol nung ethanol shilem 20 meyoktepba ajanga gari engine nung timtem agütsür aser 'mileage' kanga ajemdaktsür, ta aikati ashishia ola adokdar.



July 27, 2026 nü New Delhi nung Ato kilonser, Narendra Modi aser Punjab BJP Tir, Kewal Singh Dhillon na senden amendang tangokba noksa nung angur.

SC-i SIT dang Ram tekülem ki tenla auyaba report agüjang ta tuyur

New Delhi, July 27 (Agencies): Hombarnü Supreme Court-i Ayodhya nung Ram tekülem ki tenla auyaba ken o bushisündangba Special Investigation Team (SIT) dang bushisündangba report ji hopta ana tsüngda agüjang, ta tuyuogo.

Chief Justice of India, Surya Kant-i, "Ajak teladak asütsüsa inyaksangshitsü. Onoki iba bushisündangba osang tejangja aginer," ta metetdaksü.

Uttar Pradesh state sorkar tenüng nung jembir Solicitor General, Tushar Mehta-i Supreme Court bench dang, iba ken o bushisündangtsü atema state sorkari IGP, Kiran S leniba nung züngsem pezüü akümba SIT ka tentet, ta metetdaksü.

Supreme Court-i state sorkar dang SIT team nungji ano züngsem ka- forensic auditor ka

shimokang, ta ashi. Ajioda state sorkar tenüng nung Mehta-i iba temepishibaji agizük.

Tamalen Supreme Court-i Ram Janmabhoomi Teerth Kshetra Trust danga iba dak sendakba report agüjang, ta tuyua liasü.

Ram tekülem kidang tenla auyaba dak sendakba nung forensic audit ka agitsü aser Comptroller and Auditor General (CAG) nem Trust indang accounts reprangshidaktsütsü atema court nung temepishiba ken otem benoka lir.

Temepishiba ken o agütsürtemi Uttar Pradesh sorkari tentetba SIT-i bushisündangbaji ashishir, kechiyong FIR mebenoki bushisündang tenzük aser iba ken o ya SIT-i masü saka

independent agency kati bushisündangtsüla, ta metetdakja liasü.

Tamalen Faizabad Bar Association nung lawyer temia, Ram tekülem ki tenla auyaba dak sendakba ken o nung court dang taoba mapang Shri Ram Janmabhoomi Teerth Kshetra Trust nung general secretary inyaksang, Champat Rai den taoba mapang trust züngsemtem- Anil Mishra aser Gopal Rao nunger anema FIR benokang ta mepishiogo.

Faizabad Bar Association-isa Ram tekülem ki tenla auyaba nung tai tonglokja alirtem atema ken o mejembitsütsü telemetba agiogo aser züngsem kari danga tai tonglokja alirtem atema ken o jembitsüra senchi lakh 5 achitsü aser association nungi anentsütsü.



New Delhi, July 27, 2026: Activist Sonam Wangchuk Medanta Hospital nungi 'discharge' asüba sülen pa kinüngtsü. Gitanjali J Angmo tenati Rajghat semdanga Mahatma Gandhi nem akhüm agütsüdang tangokba noksa nung angur.



**पावरग्रिड
POWERGRID**

SANGDONGER

1. Electricity Act, 2003 nung Section 62 nung Section 79 (1) kübok North Eastern Region Strengthening scheme XVIII aser Central Electricity Regulatory Commission (Conduct of Business) Regulations, 2023 nung Regulation 23 kübok Regulation 15 (1) (a) aser Central Electricity Regulatory Commission (Terms and Condition of Tariff Regulations) 2024 nung ajemdaker determination of tariff atema petition meshir.

2. Tekalen shia aliba Transmission system nungi beneficiaries ji : (a) Govt. of Arunachal Pradesh (b) Assam Power Distribution Co. Ltd. (c) Manipur State Electricity Distribution Co. Ltd. (d) Meghalaya Energy Co. Ltd. (e) Power & Electricity Dept. of Mizoram (f) Dept. of Power Govt. of Nagaland (g) Tripura State Electricity Board lir.

Asset detail:

Particulars	Asset-1
Approved capital cost of the project	Rs. 1468.00 Lakhs (FR)
Scheduled date of commercial operation	30.04.2025
Actual date of commercial operation	24.04.2026
Capital cost on the date of commercial operation	Rs. 1467.05 Lakhs

Tariff details:

Asset detail	2024-25	2025-26	2026-27	2027-28	2028-29	Rs in Lakhs
Asset-1	AFC	--	--	153.53	198.59	212.14

Determination of tariff atema yangluba application copy ka applicant indang website www.powergrid.in nung agüja lir.

Application nung determination of tariff atema proposals nung tebilemba mesüra tashishiba kar danga lira iba sangdong agütsüba sülen anogo 30 tsüngda beneficiary densema nisung mashie kati Secretary, Central Electricity Regulatory Commission, 6th, 7th & 8th Floors, Tower B, World Trade Centre, Nauroji Nagar, New Delhi- 110029 (mesüra Commission indang office aliba tanga address nung), applicant nem copy ka densema corporate office address nung agütsütsüla.

Place: Gurgaon
Date: 22.07.2026

Sd/-
Sr GM (Commercial)

POWER GRID CORPORATION OF INDIA LTD
(A Government of India Enterprise)
Registered Office: B-9, Qutab Institutional Area, Katwaria Sarai, New Delhi 110 016
Corporate Office: Saudamini, Plot No.2, Sector-29, Gurugram, Haryana - 122 001
CIN: L40101DL1989GOI038121

A Maharatna PSU



TIR YIMYIM YIMOBILEM (EDITORIAL)

DIMAPUR TUESDAY, JULY (CHITENI) 28, 2026

Asenoki politics-ang jembiner !

Asenok ya rongsen nung sensakba agi asen government-i yimti yimdonga topur junga anepalu mesüteter aser tang ama anentsü aser tüzümsüing agi kangshiba mapanga nübortem dangi mapang shitak nung teyrai meyokteter. Kasaji, kija kibongtem nunga ita sen aser pension sen terara anguba agi tüzümar jangji chiyonga taküm alir dang ashi, ita sen aser pension senji mangu nungbo semchir semnurtem tashi chiyongtsü maka timatemtsüba tia nung asenok lir. Aji oda, ita sen a machir aser pension sen a mangur ta alir nübortema India government-i yokba 'relief' jang agi taküm alir dang ashi, iba jangji maru anen nungbo asenok aika arem shiruru ama arem shi aser süngolio mejaka taküm alitsüsa akümtsü. Aji oda, ita sen achirtema aser business inyakertema sen terara anguba agi anarongdena pei chirnurtem kaketreju balalai yoka kaketshisatsü bushidaktsür , ajisüaka parnokji züngtemer inyaksü asoshi mapa kecha renemtsüa maka ser asenok politics jembia amonger. Asenoki tanü kaketrejutem nung alirtem ya asüng kechi inyakdaktsütsü ta shisabolua mebilemer aser parnok atemaji mangdang ka lemsatepa sentong yanglutsü mejangrar. Ajisüaka, asenoki jangrabaji taruba election indang jembitsü jangrar, anungji asenok asoshibo chi, shi aser sen angudakji alu masü, industry nungia masü aser business inyakba nungia masü saka party politics aser election nungiang angutsü amai asenoki bilema jembir. Aji oda, asen lima nung school aser mozü ki tajungba akatsüsa shisalemsateptsübaji amajok nung mapang endoker amai asenoki bilemer, ajisüaka taruba election nung shiba idaktsütsü aser koba teloki yimsü asütsü ta asüba politics otsüjiang asenok asoshi shitakba tarutsü lima aser inyaka aotsüba mangdang akümer. Kasaji, tang ama asenok sensaka melii asenoka asensasa asen nüngdakbo nguteta alitsü asoshi economic aser infrastructure development indang jembitsüba dang nungibo asenoki ano lokti tentet tasen ka tenzüka aotsüba indangang tejembinüba jembir. Aji oda, asenok asoshi electricity peria akatsüba dang nungibo ano telok tasen ka tenteta saru sarua senden alitsübjang jangratemtsüka bilemer. Kasaji, asenok asoshi gari lenmang tajung akatsü aser asen lima nunga ayongayonga train nung jajatsüsa sentong yanglua inyaksübaji masü saka amajok nung tenüng agitsü aser tiyazü nung tenüngsangtepba politics nung asenok asangsang nung masü saka pongmang lima nung liteper amai asenok alir. Atangji, politics agi yimten lateter aser yimteni nübortem nem tang aser tarutsü nung inyaksüba sentong shitak latetja inyakdaktsür. Iba poltics jagibo election indang masü saka development indang jembir aser lokti tentettsüba indang masü saka kija shiai pei lima rongsenren jenjang ajungkettsüba nung aser terenlok mapa inyaksüba sentong nung shilem tajung agir. Aji oda, politics-sa asüyonga election indang politics masü aser telok ka anema ka tentettsüba politics-a masü saka koba politics agi asen lima nung alu tajungba yimteteter aser alu nungi züsentedba aser metsütetbatem jagi Food Processing industry lapokba ajanga lanurtem pei pei kaketreju nung züngzük-mezüngzük ka aruagi item alu aser industry nungji mapa inyaker, iba politics tajungji asenoki jembitsüla. Aji oda, asenoki politics mejemibo melitettsüji ta bilemra, koba politics agi, asenok peria electric tashi angutsü aser koba politics agi asen lima nung gari aser train lenmang tajungba lapoka jajatsü, koba politics agi asen lima nung taneptsü angutsü, koba polictic agi asen lima nung kaketshisatsü tajungtiba ngutettsü aser koba politics agi kaketshirtem züngzükli pei lima nung mapa angur, iba politics tajungji asenok mangdang aser mapa kuma jembitsü kanga nüngdaka kümogo.

OLEMSABANG

TENLA KIJİ TONGTIBANG MASÜ

~ Thriocy Stm, Mokokcung

Oagi tenemtsüng nung yim tiyong nung,
Tenla kiji koda akhüm keta merena
yangertet angur, tonga or reprangdangra
kima tashi nung marble lema angutsü,
Ya atamata rongsen indoka yangertetba
tenla ki ka masü.

Yimji kanga tulubo masü, saka
yangji aliba nüburtemji tamanger tesa,
tanur tain ajak Khrista agizüker ka ka,
Sentep senji nung temeranger tesa lir,
Tepur tajung tenlakiji azüngmeyaka meyutsür.

Saka tesasatsü kaji nübur madak
Tsüngremer temoatsü tera okronger ama angur,
Kechiyong Tsüngremi tepur tajung sentsü
peranga yangerteta aliba tenla
ki dak meranglok, saka Tsüngremi
nübur mulungjang dak dang ranglok.

Tenla tenji süaka ajemalua tenlaba ka masü,
saka ozü kibongi timba aser
tajungba tenlar ta par mulungjang
nung lir, ibaji ang Tsüngremi
agizüker ta par tangatetba nung lir.

Arogo nung süaka yimden tsütsü süaka
par yimsüsüba nung tartsü iadoker,
ka tuluba ka ang tashiba ta nungtepdang
nübur madak Tsüngremer temoatsü
tezülen nemnena yutsür,
yangji Tsüngrema koda pelatsüaka.

Rongsen jenti indoka tepur
tajung sentsüpranga yangertetba
tenla ki dakji Tsüngremi rangloker
masü, saka yangji tekülemer ka
mulungjang dak Tsüngremi rangloker.

- Yimozülur dangi -

Open letter to National Highways Minister, Govt. of Nagaland.

Sir,

Tang asen Nagalima nung tzünglu tali arua lenmangtem anenzüka aoba naia meteta alitsü imlar, aika rongnung ni jangja meteta aliba lenmang ka indang shinür. Unger lushi NH-2 20th July 2026 nung highways anenzüka bener ao, ajisüaka Unger nungi Chuchuyimlang tashi lenmang tejen tilaka lir, iba lenmang hopta ka tashi nunga car junga senzütetsüsa repairing mesüteter, shiti süra ibai JCB, Road Roller amala neja mesüra company indang sen agütsüa amshitsüsa akaba tesem ka lir, iba den Unger lushi nung lung talubusa kar asünungji anogo ana asem shi nung lung truck load 40/50 shi toka roller agi menüng asübo car melamela senzütsüa yangluteter lila, NH staff aser temeküt alir teyaritepertembo pei tashi dak alia timtema inyakaka machinery peria mali inyaker asünungji mapa jukujunga maor.

Sir, ya nai mapa makoker asü Govt. of Nagaland tashi maitba agi yamai menumeyanger metetnür. Tang ama osettsüset aser machinery peria akadak süngla yamai menua yutsür nung Nagalima tezülen alir tiaji koma asütsü? Ta nemjema bilemer. Anungji lenmangtem terkarba nung yanglushitsü asoshi department-i sen yakta lemsütsütsüla iba den State Govt.-ia emergency fund nungi sen agiteta mapa kara inyaksü ayongzüker.

~ S. T. Yapang Lkr, Kohima.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran nung Protestant Tenlaki tejentiba shibangtsüogo



1993 kum May ita nung Iran yimtiba, Tehran nung aliba St. Peter Evangelical Arogo Tenla kidang tekülem sentong agidang tangokba noksa nung angur.

July 27, 2026: Iran yimtiba, Tehran nung aliba St. Peter Evangelical Arogo Tenla ki ketdangsertemi shibangtsüogo, ta osang ka ajanga metetdaksü.

Iba Tenla ki ya kum 150 tejaklen asüba lir.

St. Peter Arogo nung taoba mapang lenir, Mansour Khajehpour-i, kiyong nung alirtem ajaki iba Arogo Tenla ki ya meteta lir, ta ashi. Iba kiyong nungji pa-a 1991 nungi 1993 kum tashi ali.

University student asüba mapang Khajehpour-a Arogo compound nung aliba ki ka nung ali.

Iba Tenla ki ya synagogue ka aser Zoroastrian fire temple anasa lir.

Iba Tenla ki anasasa Orthodox Arogo Tenla ki ka, museum ka aser Armenian nung social club ka lir. Khajehpour-a Tehran yimti nung 1986 kum nungi 1996 kum tashi aliba mapang nung St. Peter Evangelical Arogo nung züngsem 150 nungi 200 shi liasü. Arogo nung züngsemtem rongnung Muslim, Yihuda aser Zoroastria yimsü toktsür Khristan yimsü agizükertem densema liasü.

"Iba kiyong nung sobaliba balala benschirtem aser yimsü balala amangertem tsüngda tesendaktep junga lir aser ajak tesünep nung alir. Ajisüaka Islamic Republic of Iran-i iba tesendaktepji raksatsütsü meranger," ta Khajehpour-i metetdaksü.

Taoba ita Iran sorkari Arogo compound ji linük meyong lir, ta sangdonga liasü. Arogo compound nungji Tenla ki, ki ter dak tali aser school ana lir.

"Security sepaitemi amokmerenba agi hopta ana tejaklen Arogo compound nung alir kibong 8 bo jena oadokogo," ta Synod of Evangelical Church of Iran in Diaspora nung executive secretary, Sargez Benjamin-i metetdaksü.

Iba sülen anogo ishika lir ano kibong aika jena ao, ta paisa metetdaksü.

Benjamin ya 2008 kum nungi 2015 kum tashi St. Peter

Arogo nung pastor inyaka liasü.

Osangbener den jembidang Benjamin-i, Arogo compound nung aliba kiojen 20 nung Assyrian aser Armenian nung Khristan kibong 28 telidak liasü, saka tangbo Khristan kibong asem dang anünga lir, ta metetdaksü.

Security sepaitemi tanüngba kibong asem dangjia tekeraba nung oadokang ta tuyur, ta Benjamin-i metetdaksü.

Arogo compound nung alirtemji karbo Arogo nung kum aika züngsemtem liasü, aser karbo 2014 kum nungi alirtem lir.

Tawa sorkar ketdangsertemi Arogo office aser synod secretary office na shibangtsüogo aser Arogo nung züngsemtem adenshiba mesüra tekülem agiba ajak nokdangogo, ta Benjamin-i metetdaksü.

"Joko tangbo Arogo meyong kiojen kecha anünga mali. Tang tesüsa St. Peter Arogo kiojen agiadokogo," ta pai metetdaksü.

2023 kum tashi nungbo Iran nung Presbyterian Arogo trok liasü.

Kum ter tejaklen Iran ketdangsertemi, St. Peter ya America nung missionary temi tentetba lir, aser Arogo compound ya bendangertem meyong liasü, anungji sorkari tanaben agiadoktsü temeden lir, ta metetdaksü.

1979 kum sorkari St. Peter indang tebur school bo agiadoker liasü.

Ajisüaka Khajehpour aser Benjamin nati, "Tangbo item kiojen ya America nung meyong masü, kechiyong item kiojenji kum aika jakdang Iran nung Khristantem nem agütsüogo. Iba ya Iran nung Khristantem meyong, Iba ya onok meyong," ta metetdaksü.

1979 kum Iran revolution mapang nung Iran nung Evangelical Arogoi Arogo compound tesadangbo American Presbyterian Mission dang nungi alizüker liasü, aser tezülutepba kuliji Arogo ket nung lir, ta Benjamin-i ashi.

1994 kum American

Presbyterian Mission-i Washington nung aliba Iran diplomatic office ajanga tanüngba kiojenji-a Evangelical Synod nem agütsür, ta sangdong.

Ajisüaka Iran ketdangsertemi 1998 kum Islamic Revolutionary Court tetuyuba benschitsü, ta shia Arogo compound ajakji sorkar meyong ta tekong meranga nokdaker.

Tesüiba kum ishika tsüngda Iran nung Khristantem kanga reshikangshia arur aser Khristantem teimba-teimba dang apur.

2014 kum nungi sorkari Farsi oshi nung sayutsüngirtem nokdangogo, kechiyong iba oshi jembirtem ya teimbaka Islam yimsü toktsür Khristan yimsü agizükertem lir.

Benjamin-i, Iran nung aikati Khrista osangtajung metettsü janrar, aser ibaji ajanga Iran ketdangsertemi Protestant Arogotem anema inyaker, ta metetdaksü.

Yemen nung Khristantem kanga apur

July 27, 2026: Tesüiba ita aika Yemen linük nung Khristantem apuba kanga bulua kumogo, ta osang ka ajanga metetdaksü.

Khristantemi sorkar anema inyaker ta tai tonglokja lenmang nung mesüra kidang lia apur. Yemen nung Khristantem aika Houthi-i ketdangsüba jail tem nung puoka lir aser Khristantem karbo samaogo. Khristan tamanger asüba agi aika reshikangshir mesüra tepseter.

Yemen nungbo Khristan kati yimjak nung pei yimsü benschitsü makok, Kangki amshitsü makok mesüra yimjak nung tangar den Khristan yimsü lemsateptsü makok, ibayongji iba linük nung Khristantemi miimshia dang külemer.

Yemen nung Khristan nütsüng ishika dang lir, aser Khristantemi teimbaka Islam yimsü toktsür Khristan yimsü agizükertem lir.

ANOGO ABEN TSÜNGREM DEN

"Masü, Kibuba" temelen masü

Idangyongji parnoki parnok rong aser parnok tebu toktsü aser Pa sülen anidak. Mathi 4:22

Kodang Yisui Pa mapa tenzük, Pa kijai "temulung meyiptsü aser kumzüksü" osangtajungji alima ajunga dangi bener moutettsü ta Pai meteta liasü. Iba melen, Pai sayutettsüba nütsüng 12 shimtet aser parnoki tangar dang sayutettsüba pur dang sayutsü. (2 Timothy 2:2). Yisui Pa den atentsü ajaba rongnung Yakob aser Yohan mezüngbuba aja. Kodang Yisui parnok den jembida parnoki ibai tebilemba tajung ta mashi, mesüra marutettsü taka mashi, saka idangyongjisa anidak. Kum aika tejakdang Abraham dang Tsüngremi jembida, parnoki ashi, "Hai, Kibuba." Parnoki tesülen ajak doktsü - parnok tebu, parnok rong, aser parnok tesüiba takum kechiaser Yisui parnok aja.

Tanüa Yisui na aser ni ajar. Asenok takum azüoker Pa sülen anidaktsü Pai ajar. Peisasa azüoker anogoshia pei kangki aputsü Pai ajar (Luke 9:23). Ajak dak alia Pa tali meimtsü asoshi Pai asenok ajar. Tebu, tetsü, chirnur, adianu, kinüngtsü dang tali Ni meimra pa/la Kü nütsüng asütsü metemsü (Luke 14:26-27). Asenoki ajak toktsür asü, mesüra kar dang asen takum den sütepba yanglur tetsüng külenbo alima nungsa ajemmoker Pa sülen anidaker? Kodang Pai Pa anidaktsü ozüng agütsür "Kibubaji" temelen ka masür. Idakji telangzütsü ana dang lir: "Lemang mali" mesüra "Hai, Kibuba". Kodang Pai asenok jadira asenok Yakob aser Yohani anidakba ama anidaktsüla. Idangyongji parnoki parnok akaba ajak toktsür Pai ajaba nangzük. Tatemzükba kuli teyanglu. Pai kechi atema asenok aja iba atema Pai asenok renemtsütsü ta metettang.

Oba, ni tanü Ne ola angashitsü kü temetetba shisatsü nung kongshiang aser ni tashi anga nangzükdakjang. Amen.

Human Rights Watch & Ministries-i, tawa Yemen nung 2016 kum March ita nunga Khristantem aika apur aser jail Islamic State teloki nung aliba Khristantem aika samar; parnokji tepsetadoker asütsüa akok, ta metetdaksü.

2000s tetenzüklen Yemen nung Al-Qaida telok jenoka aliba mapang nung bendanger Khristan missionary tem anema inyakba tatalokba aika liasü.

2002 kum December ita nunga nisung kati America nung Baptist missionary asem- William Koehn, Kathleen Gariety aser Martha Myers nung khaseta liasü.

Missionary asem khasetsang jagi police dang, Islam yimsü asüngtettsü aser Tsüngrem anasa taliba aotsü atema pai missionary temji khaset, ta metetdakja liasü.

2021 kum nunga al-Qaida teloki America nung tesayur, Joel Shrum khaseta liasü. Arrshi kum 29 Joel jagi Yemen nung Khristan yimsü proker ta

pa nem tai tonglokja pa khaset. 2016 kum March ita nunga Islamic State teloki Missionaries of Charity home ka amakba mapang nung nun pezü aser Khristan 12 khaseta liasü.

Item ama tatalokba kanga bulua akumba ajanga missionary aikati Yemen linük toktsür ao, ajisüaka anüngzükba missionary ishikati kanga tasü itta maneni Khrista osangtajung prok.

2017 kum tashi nungbo Yemen nung aliba bendanger missionary tem ka danga manüng, ajisüaka parnoki metsüh proka yutsüba ajanga Yemen nung aliba yimitem, kanga tezülen aliba tenemlen aser lisem-limatem nung Khristan meyrjang aika lir.

Tang alima nung Khristantem alitsü atema linük tamajungtiba 50 rongnung Yemen ya jenjang 3buba nung lir (Open Doors' World 2026 Watch List).

AO OSHI ANGAZÜKDAK:

TANÜ ANGAZÜKTSÜBA OJANG



Zükdang

(v) süng agi züka nokdang (beat off)

* Azü ana ngotepa lia ni süng agi zükdang.

Zükla

(adj) temang tashi mait aküm, lulaa aküm (exhausted, become weak)

* Anogo aika lumidang temang züklaa aoer.

OLONG PAITEP # 7580

1			2			3			4	
			5		6		7			
8										
			9							
	10									
								11		12
			13				14			
15						16				

TIPLÉN

- Anenzükdak ki - (5)
- Asür mangyimba - (5)
- Temulung nung shisadang - (5)
- T _ _ _ lu - (3)
- Takdang temalen - (9)
- Tesa _ _ _ a - (3)
- Ajungbena temulungjang
tongtonglatsü atu - (5)
- Tejen lai nung tesayur - (5)
- Tsüingsak-mopung - (5)

LANGTSÜNGLEN

- Reprangdaksü - (4)
- _ _ _ ur - (3)
- Kiojen yangludak - (6)
- _ _ _ _ _ ait - (7)
- Nagaland nung ayong ka - (5)
- Küm kasa purtem - (5)
- Tetsüing tajemtdak - (6)
- _ _ _ _ _ adenshi - (4)
- Tsünüsenbongtsü adokdak - (3)

OLONG PAITEP # 7579 TELANGZÜBA

TIPLÉN :

- Aben, 4. Artsü, 7. Lisem, 8. Liwa,
- Sarasadem, 12. Aket, 14. Mangu,
- Anünü, 16. Ango.

LANGTSÜNGLEN :

- Aruli, 3. Balala, 5.Suwar,
- Belem, 9. Süjak, 10.Aonung,
- Dokan, 13. Tinu.

NAI-A YA METETTER



Bandai Namco music label Lantis-i hopta 52 nung THE IDOLM@STER Million Live! Atema one-CD-per-week release campaign agiba ajanga Guinness World Records title ka nguogo. July 15, 2026 nü SPECIAL SOLO RECORDS ajanga "most consecutive weeks to release a version of the same music on a CD by a music act" indang Guinness record ka yanglua liasü.

July 23, 2025 nungi July 15, 2026 tashi iba campaign agia arudang hopta shia 52 solo collection CDs saya aser kensep shia IDOLM@STER indang 52 idols nungi ka sayua liasü.

Meghalaya kaketshirtemi district-level NEET centres meshir

Shillong, July 27, 2026 (Agencies): Union Education Minister Dharmendra Pradhan-i mapa nungi anenba ajanga NEET ashishitep ken o metembanger ta Meghalaya nung kaketshir telok aikati shiogo.

Linük nung examination system kanga mejungi lir anungji district-level NEET examination centres aser tanga tongtipang mapatem densema temelenshi tulu nüngdaker ta parnoki ashi.

Jaintia Students' Movement (JSM)-i sorkar dang Jaintia Hills nung NEET examination centres lapoktsü ayongzükogo. Jowai mesüra Khliehriat nung teti atema NEET examination centres amenoktsüla aser Meghalaya kübok district headquarters shia nung ibala

mesükba centres lapoktsüla ta parnoki metetdaksü.

Tang inyakyim ajanga kaketshirtemi senotsü aika endoker aser talisa sensaker kibongtem nungi kaketshirtemi examination centres-i aodak sen aika endoktsüsa akümer ta JSM-i ashi.

Sensaktia mesüra tesem ajanga kaketshirtem kasa jenjang nung shisaliok angutsüba nung tenokdangba magütsütsüla ta parnokisa metetdaksü.

JSM-isa NEET-UG 2024 nung tim masübatem mapang tatakzük yur bushisüngdang asütsü ahangba agütsüogo. Iba maparen nung tim masüba aliba kulitem ngura tanaben agishitsüla ta parnokisa akhanger.

Education Minister melenba

ajanga examination system nung kongshia aliba khurettem magiener ta Khasi Students' Union (KSU)-ia metetdaksüogo.

"K a k e t s h i r t e m tebilemstsütem mangai yutsüra temaba menden nung alirtem tebilemstsü khuret abentsü ta pai sodi meshiba ajanga sayur" ta KSU general secretary Reuben Najjar-i ashi.

Onoki Jantar Mantar lungkak aitba nung shilem agiba ya education system nung yimtenren meinprong aliba anemba lir ta Jaintia Students' Union (JSU)-ia ashi.

Political party temi iba movement nungi pilatsüla kechiyong onoki kaketshirtem taginübatem kümzüka ayutsü nükjidong nung dang iba mapa inyaker ta JSU-isa metetdaksü.

Assam CM Sarma-i Rs 12 crore relief drive sangoktsür

Guwahati, July 27, 2026 (Agencies): Assam tzümetsüng lendong nung Guwahati Urban nungi nisung ka asüba züngsema tasür ajak agi 66 kümogo ta Chief Minister Himanta Biswa Sarma-i Deobarnü metetdaksü.

Chief Minister Sarma-isa Assam nung BJP züngsemtemi tzümetsüng agi kongshia alirtem atema relief operations nung akokba tashi yariteptsü mepishia metetdaksüogo.

Assam BJP-i Rs 12-crore

relief initiative tenzükogo aser iba ya tzümetsüng agi kongshia aliba tetsürtem nem Mekhela-Chadors lakh 2 aser tanur lakh 2 nem süoshi agütsütsü atema lir ta CM Sarma-isa ashi.

Paisa party züngsemtem aser pusemertem dang Rs 2,000 den tajemba tenlatsü mulungertemi senji local MLAs ajanga agütsütsü ayongzükogo.

CM Sarma-isa Rs 2,000 den talila tenlanürtemi designated bank account nung indangindanga yoktsü aser

social media nung osang tejanga metetdaksütsü ta shiogo.

Assam aser linük kübok tesem balala nung aliba BJP züngsemtemi iba mapa nung yariteptsü nangzükogo. Taruba anogo pezü nungi pungu tsüngda Rs 12 crore alizüng atongtsü aser iba ajanga Sivasagar, Charaideo, Golaghat o Jorhat district tem nung tzümetsüng agi kongshia alirtem yaritettsü ta paisa metetdaksü.

Kangla Gate nung Naga nunger 6 atema candlelight vigil agi



Imphal, July 27, 2026 (Agencies): Liangmai Naga civilians trok tepsetba atema temeten meshia Imphal nung aliba Kangla Gate nung candlelight vigil ka agiogo.

Külen, Ukhrul nung Kuki Civil Society Organisations (CSOs) Working Committee ajanga tenokdangba ka agütsütsü aliba thinenogo.

Joint Tribes Council (JTC) kübok Justice for the Six Sons of Kouburu United Committee ajanga candlelight vigil ayonga agi.

"Tasür kibongtemi ahangba ama meinyak tashi JNIMS mortuary nungi tasü mangtem memeshitsü" ta Rongmei Naga Luh Phuum (RNLP) president Chingdinliu Panmei-i ashi.

Onoki takhangba onüktem agütsüba nung teta alirtem pua lir ta asüba official shidi kecha mangu lir ta lungkak aitertemi ashi.

May 2026 nung Liangmai Naga civilians pur aoba aser tepsetba sülen JTC-i sorkar nem onük pungu takhangba agütsü.

Takhangba onüktem rongnung nisung tepsetba nung shilem agir ajak aputsü, telungpur teloktem den Suspension of Operations (SoO) agreement agientsü, Kuki National Front-P (KNF-P) ya terrorist organization ka ama sangdongtsü, Deputy Chief Minister Nemcha Kipgen mapa nungi anentsü aser iba tesem

nungi ozüng alema akümba yimtsüngtem agientsü dena lir.

Iba lungkak aitba nung shilem ka ama United Naga Council dena Naga nunger teloktemi Kuki-Zo nunger aliba tesemtem nung mapang tatakzük melii 'economic blockade' tenzükogo.

Külen, Ukhrul nung Kuki CSO Working Committee ajanga 'counter-blockade' agitsü aliba thinenogo. Kangpokpi nung parnok külem senden ka amenba sülen iba lemtet agi.

R o n g s e n k e t z ü n g tebilemstsü koktettsü atema sorkar ketdangpurtem den olemteptsü aser iba osang public nem metetdaksütsü ta committee-i ashi.

Tang tashi Strait of Hormuz onok kübok lir: Iran

Dubai, Chiteni/July 27 (Agencies): Hopta ana bomb poklokja aruba US Tir Donald Trump-i anenba sülen, Strait of Hormuz ya tang tashi onok kübok lir aser United States den yimjung ken o jembitenzüksü memeranger ta Iran-i Hombarnü ashi.

Aonung 13 tashi ashitena bomb pokloktsüba ajanga Tehran-ia Middle East nung US mitkartem alidak amakba sülen Trump-i hopta tatemlen anena liasü. US-i amakba anena ali tashi Iran-ia amakba anentsü ta ashir.

US-i bomb pokloktsüba anenba ajanga teimla nung totzü jenjang ajema akum. Taoba hopta Brent crude barrel nung sen \$100 dak tema meshia aliba Hombarnep shilem 8 dak tema agi ajema barrel nung sen \$89 meshia liasü.

Ajisüaka Hombarnü Jordan-i drones ana khazüka yoko ta angazüker aser Iraqi security osang ajanga ashiba agi, Iraq north tsütsü Iranian Kurdish opposition fighters aliba tesem ka nung drones amshia amak. Tatalokba ana nung asü-amaba osangbo mali.

Trump-i Iran amakba anentsü telemtetba agiba ya Iran-i strait amokbanga aliba raksatsütsü nükjidong nung par mitkari bomb poklokja amakba nung alia oa inyakogo ta mitkar temi ashiba nung anidakba ama ajiteter, ta US ketdangsür aser osang balala ajanga ashir.

Mitkar tanishir temi tir dang par targets makai kumogo ta ashir, ta US ketdangsür kati osangbener dang ashir. Joint Chiefs of Staff mendenpuba, General Dan Caine-i air defence munitions ajema akumba tebilemtsü lemsatep, ta ketdangsüri ashir.

Jembishinü atema maongka agütsütsü mechi Trump-i bomb

pokloktsüba soit, ta U.S. ambassador to the United Nations, Mike Waltz-i Deobarnü ashi.

Trump, Secretary of State Marco Rubio aser tanga US ketdangsür temi Iran-i tezüngzüktep ka agitsü mepishir ta ashir.

Ajisüaka Iran indang Foreign Ministry odongtar Esmail Baghaei-i Hombarnü television nung osangbener den jembidangbo, Iran-i United States den yimjung ken o jembishinü tenzüksütsü masüngdang, ta shia liasü.

Mediators ajanga linük ana tsüngta osang belenteper aser Iran-i yimjung metoktsü, saka Iran-i US den jembishinü asütsü mepishir ta osang prokshiba ya tiazü, ta Baghaei-i ashi. "Ibaji asen DNA nung mali."

Tehran-isa alima nung energy markets asoshi tongtipangtiba tzü lenmang ya par-i azüoka aliba ama sayur.

Temelaba makai strait ajangtsü merangba rong trok Iran-i Hombarnep meyipa yokogo ta osang kar ajanga ashir. Item rongnung rong ka lendong ajuru, ta osang ajanga ashir.

"Taoba mapang sangdonga ali ama, Strait of Hormuz nung traffic route ya Iran-i tejangja latettsüba lenmang lir, aser tanga lenmangtem ya tamajung kumogo aser tetokolen lenmang maka," ta osang ajanga ashir.

United States-i strait nung senzüba rong tem dang Oman tzükum anasa senzütsü ashiba sülen iba tesem ajanga senzüba rong tem dak Tehran-i injang aser bomb khaloktsüba sülen Iran merenshitsü mechi Trump-i asendenshi bomb pokloktsü tenzüka liasü.

Iran-i par tzükumlen channel ka ajanga rong tem

senzütsü akok ta ashir, koba par kübok lir aser parnoki yangji senzüba atema senotsü meshitsü tebilemba lir.

US-i asendenshir hopta ana bomb pokloktsüba ajanga Iran nung nisung aika tepset aser linük south len apu aser longpok aika raksatsü aser military targets nunga amak. Iran-ia meyiper kidanger Arab linüktem nung US mitkartem alidak amakdang US sepai pezü tepset.

Iran-isa Gulf linüktem nung civilian infrastructure nunga amak aser ibai US-i civilian targets nung amakba atema tayang kepzükbä lir ta ashir.

Taoba hopta Iran tembar Houthi telungpur-ia tongtipang tzü lenmang tanabuba nung totzü abenba nung timtem agütsütsü amokmerena Red Sea nung Saudi Arabia indang oil industry mokdanger ta sangdonga totzü jenjang tali timba kumdaktsü.

Iran indang nuclear sentong densema tongtipang ken o tem August ita tatem tashinung jembishinü tenzüksü nükjidong yur Washington aser Tehran tsüngta June ita tangatettep kati arua liasü.

Ajisüaka linük anaprongi iba memorandum nung Strait of Hormuz indang ojang ya balala rateta agir, kong Washington-i iba tesem ajanga rong tem sadema senzüdaktsütsüla ta ashir saka Iran-i iba tesem nung rong senzüba ketdangsütsü par nem tashi agütsür ta ashir.

Iran yagi Oman den tezüngzüktep ka yanglua strait azüoktsü nükjidong lir, kechiaser tzükum külen Oman kübok lir. Iba onük jembitsü atema Omani delegation ka hopta tatemlen Tehran nung arua liasü aser Iranian Foreign Ministry odongtar Baghaei-ia jembishinü kanga junga kaogo ta ashir.

Sudan army-i tongtiband highway ka azüokogo

Khartoum, Chiteni/July 27 (Agencies): Sudanese army-i sangdong ka ajanga linük yimtiba Khartoum aser el-Obeid na sendaktepba tongtiband highway ka parnoki azüokogo, ta metetdaktsüogo. Iba lenmang ya paramilitary Rapid Support Forces (RSF)-i atsünger liasü.

Deobarnü Al Sadarat highway atsüngba ajanga sepaitem, prangbong injang, totzü aser oset balala belenshitsü atema Sudan army nem teyari agütsütsü, aser RSF-i North Kordofan state yimtiba el-Obeid atsüngtsü atema nongshia aliba nokdangtsü. Nisung million tesimal ka

iba yimti nung sabanga lir, kong United Nations-i humanitarian lendong tulu adoktsü ta tekümdangtsü metetdaktsüogo. Iba yimti nung alirtem ya RSF-i drone amshia amakba ajanga kanga timtepa arudar.

Deobarnü Sudanese army-i ashiba agi, anogo ana RSF den raratepba sülen parnoki Khartoum aser el-Obied na tsüngda aliba yimti aser jilatem meyipa agiogo. Iba highway ya RSF puri azüoker liasü.

Ita aika sülen tang mezügbuba paramilitary anema jenjang tesashi agiogo.

Army-i ashiba agi, sepaitemi Um Qurfa aser Jarigakh na meyipa agiogo aser iba mapang

RSF sepaitem aika tepsetba den hadirtem aika raksatsüogo aser RSF sepaitem jenshidakja liasü.

RSF-i kü 350 talang iba tongtiband highway ya 2023 küm April ita nungi atsünger liasü.

Iba lenmang azüokba ajanga RSF pur el-Obeid yimti atsüngtsü atema inyaka aliba nung tetsükdaktsü tulu adokdaktsütsü. Iba yimti azüoktetra paramilitary force-i Sudan anüolen ajak azüoktettsü.


Iba rara nung nisung 40,000 shi taküm samaogo aser nisung million 14 dak tema pei talidak ki toktsür jenshiogo, ta World Health Organization-i metetdaktsüogo.



Office of the
Tongpok Semchir Pongen Mungdang
H.Q. Mokokchung : 798601 : Nagaland

TENÜNGSANG AGÜTSÜR

Asen lenir **Guru Sangyusang S Pongener**-i India linük kübok nüburtem nem khonang agüja tushiba tematiba rongnung ka, Padma Shree, ajangzükteta asen Pongener Kidong tejak tentetdaktsüba atema Tongpok Semchir Pongen Mungdang ajanga tenüngsang agüja tushir.
Na tarutsü mangdang tajung aser anibelem ajanga asen sobaliba senti senmang wazükdena yutsütetogo, aser asen tarutsü lanu putu asensortem atema asen sobaliba tashi itshia akasodaktsür. Ne mapa tajung atema onoki ne nem tenüngsang agüja tushir aser akhüm agütsür aser tarutsü anogotem atema moaja sarasademtsür.



Sangyusang Pongener
Nagaland
Padma Shri 2026
Art

Sdl/-
Guru Bendangwati Pongen
President, TSPM

Sdl/-
Meyatoshi Pongen
Secretary, TSPM

Caspian Sea nung rong ka amakba sülen Iran-i Ukraine amokmeren



Tehran, Chiteni/July 27 (Agencies): Iran Foreign Minister Abbas Araghchi-i, Ukraine-i Caspian Sea nung Iran indang shishilemba dang amshiba rong ka amakba ya telangzüba magütsüi metoktsütsü ta ashiba den, iba inyakyim ya United Nations Charter anema lir ta shiogo.

Deobarnü social media nung post ka ajanga Araghchi-i, rara nung Europe densemdaktsütsü atema iba rong amaktsü atema rongshiba asoshi Israel aitsüogo.

Paisa, pai European Union foreign policy tekolakba Kaja Kallas aser Russian Foreign Minister Sergey Lavrov den phone ajanga jembiba mapang iba olen ya lemsatepogo, ta ashir. Honibarnü Ukraine-i iba rong amakba sülen rong ya apok aser rongnir ka tepsetba den aika yirutsüogo, ta Iran indang Ministry of Foreign Affairs-i ashir.

Ukraine-i ashiba agi, parnoki Caspian Sea nung Iran den sendaka aliba military oset belenshiba rongtem aser Russia indang warship ka maka liasü. Ajisüaka Foreign Ministry-i ashiba agi, Russia aser Ukraine na rara nung Iran-i khen danga jushia mali.

Kasa mapang nung Iran nunger ozüng yanglur tejen kati Hombarnü X nung post ka ajanga iba rong amakba atema

Ukraine-i telangzüba angutsü akok ta shiogo. Parliament indang National Security & Foreign Policy Commission EbrahimAzizi-i ashiba agi, "Iran amakba atema telangzüba magütsüibo metoktsür aser tanüa kasaji dang lir; US aser Israel nati aji meteta lir."

"Iran-i telangzüba magütsüibo metoktsür ta Ukraine-ia yakta angatettsü akok," ta Azizi-i ashir.

Iran-i, Tehran nung Ukraine indang charge d'affaires jaoka, iba inyakyim atema tashishiba agütsüogo.

Kasa anogo Ukraine tir Volodymyr Zelenskyy-i X ajanga, Ukraine-i Caspian Sea nung rongtem kanga takok ngua makogo, kong Iran densema aliba military khu abenba rongtem aser warship ka densema lir, ta ashir.

Paisa, Iran nem military teyari agütsüba atema Russia aitsüogo.

2022 küm rara tenzükbä sülen Shahed drones meyirejang aika Moscow nem agütsüba atema Ukraine-i Tehran aitsüogo. Parnokisa Shahed drone tem nokdangtsü atema teyari agütsütsü asoshi Ukraine nunger sepaitem Gulf state temi yokogo.

Russian foreign minister Lavrov-i rongngir ka asüba atema asükhu lemsatepogo.

Nagaland Pickleball Masters 2026 takok nung tembangogo



Dimapur, Chiteni/July 27 (TYO): 1buba Nagaland Pickleball Masters 2026, July 24 nungi 26 tashi The Fitness House, Dimapur kanga takok ngua asayar tembangogo.

Iba asayamung nung India kübok tesem balala nungi asayartem arua shilem agia Nagaland ya pickleball map nung toktsüogo.

Asayamung nung category ti liasü aser asayartem ajak anogo asem kanga toktepa asayaogo. Asayamung shibangba sentong nung Shri Mhathung Yanthan, MLA & Advisor, Department of Agriculture, Government of Nagaland tongti tejaoker liasü.

Open Category Champions: Marquee tebur tarep open final nung Aditya Singh & Megotsolie Khate nati Mayank SD & Zhaputso Khate na koka liasü.

Tetsür tarep open final nung Racheal Jones & Elona Ayemi nati Manaswinee Hazarika & Nayeem Hussain akok.

Asayamung nung tanga kümsük category balala nung takok angurtem:

Split Mixed Doubles 75+

Champions: Vilasier Khate & Naomi Zhimomi

Runners-up: Abu Metha & Racheal Jones

Mixed Doubles Open
Champions: Manaswinee Hazarika & Vilasier Khate.

Runners-up: Arjun Singh & Vivian Kiba.

Men's Doubles 40+

Champions: Abu Metha & Vikho Khate

Runners-up: Lhouvi & Mongden

Men's Doubles 45+

Champions: Imli Subong & Ringo Odyuo

Runners-up: Abu Metha & Rohan Abraham

Mixed Doubles 40+

Champions: Vikho Khate & Toshi

Runners-up: Kuchi & Naomi

Asayamung nungsa tetsür o

tebur naprongla meyoktepba asayaba Champion of Champions category ka liasü, koba Aditya Singh-i kokogo.

Maneni asayamung mapang exhibition asaya aika ayongzüka asayaogo aser iba ajanga terprangertem jangrademdakja liasü.

Asayamung takok ngua asayatetba indang jembiba mapang asayamung ayongertemi asayar, official, volunteer, sponsor, partner, media representatives, aser fan tem ajak dang iba asayamung takok asoshi parnoki teyari agütsüba atema pelaba lemsatepa liasü.

Nagaland Pickleball Masters 2026 ya Northeast nung pickleball asaya renloka aoba nung tongtibang alizüing ka asütsü. Iba ajanga tokteptsü atema dang sabang tajung agütsüba masü saka kati ka metetteptsü aser iba asaya lokti tashi ishitsu asoshi teyari agütsüogo.

4buba NLA tournament 2026 July 25 nü asayaogo



Kohima, Chiteni/July 27 (TYO): 4buba Nagaland Legislative Assembly (NLA) Tournament 2026 July 25 nü Multi-Purpose Hall, Assembly Complex, Kohima nung asayaogo.

Iba asayamung ya Assembly Aces Club, Kohima-i ayongzüka asaya liasü.

Asayamung nung Badminton, Table Tennis, Carrom, aser Ludo amala asaya balala ayongzüka asayaogo.

Asayartemi asaya anogo tepeyong sportsmanship, teamwork aser tetoktepba tanüla tajung sayua asaya liasü.

Asayamung nung Special Officer to the Chief Minister of Nagaland Neibalie Rio, alakteta

jaoker liasü.

Sentong nung o jembiba mapang Rio-i asayamung nung shilem agirtem dang yimayimpong aziüoka kelaküponga masayatsü aser temaba jenjang tongtetsü atema toktepa asayatsü ajungshi.

Paisa, pei temang anema toktsütsü, yimayimpong tajung beshitsü aser asaya ajanga lokti tanüla ajungkettsü koda tongtibang iba indang lemsatep.

Asayamung ya alakteta jaokeri anir badminton exhibition asaya ka asaya-a tenzüka liasü.

Iba exhibition asaya yagi sentepa alirtem ajak ajungmeso aser iba dak ajemdaker anogo tepeyong tetoktepba balala

jangradema asayatepogo.

Asayamung tepeyong asayartemi parnok dak aliba sempet tajung sayua asayaba ajanga terpranger, ketdangsürtem aser tejaokertem ajak kanga jangrabangra kati ka support sütepa liasü.

Kasa mapang nung asayamung ayongertemi asayar ajak, ketdangsürtem, volunteer aser supporter tem ajak dang iba asayamung takok asoshi parnoki teyari agütsüba atema kanga pelaba lemsatepa liasü.

Parnokisa asaya balala nung takok angurtem nem tenüngsang agütsü aser iba asayamung takok ngua asayatetdaksüba atema shilem agir ajak dang pelaba lemsatepa liasü.

Diomande-i Real Madrid taginüba mulunga agizükogo

Chiteni/July 27, 2026 (Agencies): RB Leipzig winger Yan Diomande-i, Real Madrid indang personal term tem mulunga agizükogo. Paris St-Germain-ia pa alizüktsü tejangraba liasü saka parnoki toktsüogo.

Arishi küm 19 tain Ivory Coast nuner international asayar dak ya Liverpool-ia tenük yoka liasü. Parnoki June ita Diomande atema pound million 69 agütsüdang saka magizük. PSG-ia pa atema bid südangogo, saka magizük. Iba sülen Liverpool-i tanga asayar alizüktsü atema jenjang agiogo aser PSG-ia Real den bid mesüteptsü asoshi telemetba agiogo.

PSG-i tatema Diomande atema Deobarnü pound million 102.5 agütsüdangogo, ta osang ajanga metetdaksü.

Iba sülen Madrid-i personal term tem agizükogo, koba England nunger midfielder Jude Bellingham indang contract den mesükteper asütsü.

Real-i Diomande atema pound million 100 dak tema agütsütsü, shiba taoba küm Spanish club Leganes nungi

küm pongu atema Leipzig nung dena liasü.

Real den sendaktepa aliba source temi ashiba agi, negotiator Jose Angel aser Juni Calafat nati Diomande ya küm pongu shi asadanga aruogo.

Pa alizüktsü atema PSG pur tejakdang liasü, saka Real densemba sülen parnok Deobarnü atsüingogoo.

"Parnoki meshiba fee aser itasen ya meputep aser PSG-i rongsenketzüng achayangba aser squad liromedem atema inyakyim kechi benoka ali aji meraksatsü," ta PSG-i ashi.

Leipzig-i asayar ya mayoktsü atema kanga merangdangogo, saka club tulutem aikati pa alizüktsü tejangraba sayuba ya sentoka metoktsütet, kechiyong pa ya club-i sen timtiba agi ayokba asayar akümtsü ana nung lir.

Diomande nem 2025-26 season atema Bundesliga's young player naroküm agütsü. Pai taoba season goal 12 idaktsü aser assist ti süja liasü.

Pa ya Ivory Coast toktsür United States nung academy ka nung aden aser 2025 küm Spanish club Leganes nung dena liasü.

Shooting World Cup: Esha-i gold, Manu-i bronze medal angu

Chiteni/July 27, 2026 (Agencies): Hangzhou, ISSF World Cup nung tetsür 25m pistol event nung Esha Singh-i gold medal aser Manu Bhaker-i bronze medal nguogo.

Taküm küm tetenzüklen iba asaya nung world record tasen yangluba sülen Esha-i maneni la ya kechiba alima nung pistol akhar tajungtiba aji sayuogo. Hyderabad nungi shooter yagi final asaya tepeyong kanga junga asaya aser point 50 angutsü aliba nungi 40 ngua gold medal nguogo.

La China tsür Yueyue Zhang dang nungi point asem agi timba liasü, shibai silver medal nguogo.

Esha-i kanga junga asayaba mapang Olympic nung medal ana ngur alila Manu Bhaker-ia la indang career nung ano medal ka ngutetogo.

Kasa asaya nung bronze medal atema asayaba mapang Bhaker-i North Korea tsür Hyon Gyong Pak madak takok ngua liasü. Tena double shoot-off ka asayaba sülenang India tsürla yagi asaya koka liasü.

Iba asaya nung medal ana anguba sülen Hangzhou nung India nunger asayartem medal tally tajungba kümogo.

ISSF World Cup nung India nunger asayartemi tang tashi nung medal asem ngua lir. Kasa asayamung nung Sainyam-i tetsür 10m air pistol asaya nung silver medal ka ngur liasü.

Tang medal ana anguba sülen India team China sülen tanabuba jenjang nung lir. China-i iba asayamung nung gold medal trok densema medal 14 ngur lir. Ajisüaka iba asayamung nunga Rifle Shooters temi junga masayatet.

Tebur 50m rifle 3-positions event nung India nunger asayartemi junga masayatet. Aishwary Pratap Singh Tomar aser Niraj Kumar na asayar ti asayaba final tonga atu, saka tenapronglai qualification nung asayaba ama junga masayateti medal mongutet. Aishwary-i point 314.3 ngua trokbuba aser Niraj-i point 303.4 ngua tenetbuba nung tembanga liasü.

Iba asaya nung China nunger Olympic champion Zhang Changhong-i point 363 ngua gold medal anguba dang masü world-record yanglu aser pa sülen Hungary nunger asayar Istvan Peni-i silver aser Neutral Athlete Matvei Potapov-i bronze medal nguogo.

BILEMDANGANG

"Nisung aikati shisataka amato jembia senzür saka tamashi nisung ama alir."